



Broj, 01-07-10-51-143/2024  
Sarajevo, 13.6.2024. godine

Na osnovu člana 26. stav (4) Zakona o slobodi pristupa informacijama na nivou institucija Bosne i Hercegovine („Službeni glasnik BiH“, broj 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Muzaferre Slomić [REDACTED] od 21.3.2024. godine, dopunjenim 18.5.2024. godine, predsjednik Visokog sudskog i tužilačkog vijeća Bosne i Hercegovine donosi

## RJEŠENJE

**I Odobrava se** pristup informacijama o statusu disciplinskih postupaka protiv G [REDACTED] J [REDACTED], bivšeg sudije Osnovnog suda Brčko distrikta Bosne i Hercegovine; J [REDACTED] R [REDACTED], sutkinje Osnovnog suda u Tuzli; P [REDACTED] B [REDACTED], bivšeg sudije Suda Bosne i Hercegovine i J [REDACTED] D [REDACTED], tužiteljice Tužiteljstva Brčko distrikta Bosne i Hercegovine.

**II Odobrava se** pristup informacijama, dostavljanjem kopija anonimiziranih disciplinskih tužbi Ureda disciplinskog tužioca Visokog sudskog i tužilačkog vijeća Bosne i Hercegovine, u okončanim disciplinskim postupcima koji su vođeni protiv G [REDACTED] J [REDACTED], bivšeg sudije Osnovnog suda Brčko distrikta BiH (broj predmeta UDT: DD 010817 21 i 153/12); P [REDACTED] B [REDACTED], bivšeg sudije Suda BiH (broj predmeta UDT: DD 012871 23 i 279/17) i J [REDACTED] D [REDACTED], tužiteljice Tužiteljstva Bosne i Hercegovine (broj predmeta UDT: 127/11, 318/18 i 318/18 - dopuna).

**III Odbija se** pristup informacijama, dostavljanjem kopija disciplinskih tužbi Ureda disciplinskog tužioca Visokog sudskog i tužilačkog vijeća Bosne i Hercegovine, u disciplinskim predmetima koji su u toku, a koji se vode protiv J [REDACTED] R [REDACTED], sutkinje Općinskog suda u Tuzli (broj predmeta UDT: 11-07-6-538/2024) i J [REDACTED] D [REDACTED], tužiteljice Tužiteljstva Brčko distrikta Bosne i Hercegovine (broj predmeta UDT: 11-07-6-235/2024).

## Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je, dana 21.3.2024. godine, putem elektronske pošte zaprimilo zahtjev za pristup informacijama Muzaferre Slomić [REDACTED] (u daljem tekstu: podnositeljica zahtjeva), koji je, u skladu sa Pozivom na ispravku VSTV-a BiH, broj: 01-07-10-51-124/2024 od 17.5.2024. godine, dopunjen 18.5.2024. godine. Zahtjevom su tražene potvrđene tužbe Ureda disciplinskog tužioca (u daljem tekstu: UDT/Ured) protiv sudija G [REDACTED] J [REDACTED], R [REDACTED] J [REDACTED] i P [REDACTED] B [REDACTED], te tužiteljice J [REDACTED] D [REDACTED], kao i informacija o statusu predmeta protiv navedenih nosilaca pravosudnih funkcija.

Razmatrajući predmetni zahtjev za pristup informacijama, odlučeno je kao u dispozitivu rješenja iz sljedećih razloga:

Vijeće je, rješavajući u predmetnom zahtjevu, prethodno utvrdilo da raspolaže traženim informacijama, kao i da iste predstavljaju informacije u smislu odredbe člana 5. Zakona o slobodi pristupa informacijama na nivou institucija Bosne i Hercegovine (u daljem tekstu ZOSPI BiH).

Odlučujući u odnosu na tačku I izreke rješenja, VSTV BiH je, na osnovu odredbe člana 6. stav (1) ZOSPI-a BiH, kojom je propisano da se sve informacije institucija BiH smatraju otvorenim i javnim, osim ako je neobjavljivanje u potpunosti opravdano i zasnovano na zakonom propisanim izuzecima, utvrdio da, u odnosu na tražene informacije o statusu disciplinskih predmeta koji su vođeni ili koji se vode protiv nosilaca pravosudne funkcije iz tačke I izreke, ne postoje ograničenja prava na pristup informacijama. Naime, iako se dio traženih informacija u smislu statusa disciplinskih predmeta odnosi i na disciplinske postupke koji su u toku, VSTV BiH, kao vlasnik informacije u smislu ZOSPI-a BiH, mišljenja je da ne postoji razuman i opravdan rizik da bi omogućavanje pristupa predmetnim informacijama o statusu ovih disciplinskih postupaka, onemogućilo efikasno, nezavisno i nepristrasno izvršenje odluke ili eventualne sankcije u ovim predmetima, kako je, kao uslov za ograničenje prava pristupa informacijama, propisano odredbom člana 19. stav (5) ZOSPI-a BiH.

S tim u vezi, uvidom u službene evidencije je utvrđeno da su protiv G■■■■ J■■■■, bivšeg sudije Općinskog suda Brčko distrikta Bosne i Hercegovine vođena dva disciplinska postupka, kao i da je jedan disciplinski postupak protiv imenovanog nosioca pravosudne funkcije obustavljen 2022. godine zbog odlaska u penziju, dok je protiv imenovanog, u ranijem disciplinskom postupku iz 2013. godine, izrečena disciplinska mjera – javna opomena.

Takođe, uvidom u službene evidencije je utvrđeno da je disciplinski postupak protiv J■■■■ R■■■■, sutkinje Općinskog suda u Tuzli, u toku pred Prvostepenom disciplinskom komisijom VSTV-a BiH.

Pored navedenog, uvidom u službene evidencije je utvrđeno da je disciplinski postupak protiv P■■■■ B■■■■, bivšeg sudije Suda Bosne i Hercegovine, obustavljen 2024. godine zbog odlaska u penziju, te da je u ranijem disciplinskom postupku protiv imenovanog disciplinska tužba odbijena 2017. godine.

Nadalje, uvidom u službene evidencije je utvrđeno da su protiv J■■■■ D■■■■, tužiteljice Tužiteljstva Brčko distrikta Bosne i Hercegovine, vođena tri disciplinska postupka, od kojih je jedan postupak u toku. U odnosu na prethodne disciplinske postupke, 2019. godine je imenovanoj izrečena disciplinska mjera smanjenje plate, dok je istoj 2011. godine izrečena disciplinska mjera pismena opomena.

Odlučujući o zahtjevu za pristup informacijama u odnosu na tačku II izreke rješenja, VSTV BiH je odobrilo pristup traženim informacijama, u smislu dostavljanja elektronskom poštom kopija anonimiziranih disciplinskih tužbi Ureda disciplinskog tužioca Visokog sudskog i tužilačkog vijeća Bosne i Hercegovine, u okončanim disciplinskim postupcima koji su vođeni protiv nosilaca pravosudne funkcije obuhvaćenih predmetnim zahtjevom. Naime, Vijeće je, odlučujući u ovom dijelu ponovo u obzir uzelo odredbu člana 6. stav (1) ZOSPI-a BiH, koja otvorenost i javnost informacijama pod kontrolom institucija BiH propisuje kao pravilo, osim ako je neobjavljivanje u potpunosti opravdano i zasnovano na zakonom propisanim izuzecima.

U tom smislu, utvrđeno je da odredba člana 19. stav (2) ZOSPI-a BiH propisuje da se pristup informacijama može ograničiti s ciljem zaštite privatnosti fizičkih lica, zaštite ličnih podataka korisnika i trećih lica, u skladu sa zakonom kojim se uređuje zaštita ličnih podataka. Budući da tražene disciplinske tužbe sadržavaju lične podatke koji uživaju zaštitu u skladu sa Zakonom o zaštiti ličnih podataka, odobren je pristup informacijama u smislu dostave

disciplinskih tužbi uz ograničenje utemeljeno na odredbi člana 19. stav (2) ZOSPI-a BiH u pogledu anonimizacije ličnih podataka sadržanih u njima.

Odlučujući u odnosu na tačku III izreke rješenja, utvrđeno je postojanje ograničenja pristupa traženim informacijama u odnosu na dostavljanje kopija disciplinskih tužbi Ureda disciplinskog tužioca Visokog sudskog i tužilačkog vijeća Bosne i Hercegovine u disciplinskim predmetima koji su u toku. Naime, zakonodavac je, odredbom člana 19. stav (5) ZOSPI-a BiH, propisao da će institucija BiH ograničiti pristup informacijama koje se tiču jednakosti stranaka u sudskim postupcima i efikasnosti pravosuđa, postupaka koje vode nadležni organi u, između ostalog, disciplinskim postupcima za vrijeme trajanja tih postupaka, osim ako posebnim zakonom nije drugačije propisano i ako bi se objavljivanjem informacije onemogućilo efikasno, nezavisno i nepristrasno izvršenje odluke ili sankcije institucije BiH.

Imajući u vidu navedenu odredbu člana 19. stav (5) ZOSPI-a BiH, Vijeće je cijeno da u pogledu osiguravanja javnosti u odnosu na sadržaj disciplinskih tužbi u predmetima koji su u toku postoji opravdan i razuman rizik da bi se, odobravanjem zahtjeva u tom dijelu, moglo uticati na efikasnost, nezavisnost i nepristrasnost u odlučivanju u predmetnim postupcima za utvrđivanje disciplinske odgovornosti.


U tom smislu, utvrđeno je postojanje zakonom utvrđenog ograničenja u pogledu javnosti informacija pod kontrolom javnog organa. Odlučujući o zahtjevu u ovom dijelu, proveden je i test razmjernosti i javnog interesa u skladu sa članom 20. ZOSPI-a BiH, odnosno uzeta je u obzir svaka korist i svaka šteta koja bi mogla proizaći ukoliko bi Vijeće dostavilo traženu informaciju, bez obzira na utvrđeni izuzetak propisan zakonom te je odlučeno da je zaštita procesa donošenja odluka VSTV-a BiH u disciplinskim predmetima, kao njegova kontinuirana i osnovna nadležnost propisana u članu 17. tačka (4) Zakona o VSTV-u BiH, primarna u odnosu na javni interes, stoga je zahtjev za pristup informacijama u dijelu tačke III izreke odbijen.

Postupajući po zahtjevu podnositeljice, a u skladu sa svim gore navedenim, odlučeno je kao u dispozitivu ovog rješenja.

#### **Pouka o pravnom lijeku:**

Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Dostavljeno:

1. Podnositeljici zahtjeva
2. Uredu disciplinskog tužioca VSTV-a BiH
3. Odjelu za disciplinske postupke i etiku VSTV-a BiH
4. U spis

Prilog: Anonimizirane disciplinske tužbe iz tačke II izreke rješenja.

